

宋詩鈔初集

第一函
五十一冊

臨川詩鈔

王安石字介甫臨川人後居金陵亦號半山登進士上第簽書淮南判官再調知鄞縣通判舒州召試館職不就用爲羣牧判官知常州移提點江東刑獄嘉祐三年入爲度支判官俄直集賢院明年同修起居注知制誥糾察在京刑獄以母憂去終英宗世召不起神宗爲太子時聞其名卽位命知江寧府數月召爲翰林學士兼侍講熙寧二年拜叅知政事變行新法天下騷然罷爲觀文殿大學士知江寧府再起爲相屢謝病又罷爲鎮南節度使同平章事判江寧府改集禧觀使封舒國公元豐三年復拜左僕射觀文殿大學士換特進改封于荆哲宗加司空卒贈太傅謚曰文配食孔廟追封舒王

南渡後始罷從祀安石少以意氣自許故詩語惟其所
向不復更爲涵畜後從宋次道盡假唐人詩集博觀而
約取晚年始悟深婉不迫之趣然其精嚴深刻皆步驟
老杜所得而論者謂其有工緻無悲壯讀之久則令人
筆拘而格退余以爲不然安石遣情世外其悲壯卽寓
閒澹之中獨是議論過多亦是一病爾

元豐行示德逢

四山脩脩映赤日田背坼如龜兆出湖陰先生坐草室看
踏溝車望秋實雷蟠電掣雲滔滔夜半載雨輸亭臯旱禾
秀發埋牛尻豆死更蘇肥莢毛倒持龍骨挂屋敖買酒澆
客追前勞三年五穀賤如水今見西成復如此元豐聖人
與天通千秋萬歲與此同先生在野故不窮擊壤至老歌

元豐

後元豐行

歌元豐十日五日一雨風麥行千里不見土連山沒雲皆
種黍水秧綿綿復多稔龍骨長乾挂梁椳鱗魚出網蔽洲
渚荻筍肥甘勝牛乳百錢可得酒斗許雖非社日長聞鼓
吳兒蹋歌女起舞但道快樂無所苦老翁塹水西南流楊
柳中間棧小舟乘興欹眠過白下逢人歡笑得無愁

純甫出釋惠崇畫要予作詩

畫史紛紛何足數惠崇晚出吾最許早雲六月漲林莽移
我悠然墮洲渚黃蘆低摧雪翳土鳧雁靜立將儔侶往時
所歷今在眼沙平水澹西江浦暮氣沈舟暗魚罟欹眠嘔
輒如聞櫓頗疑道人三昧力異域山川能斷取方諸承水

調幻藥洒落生綃變寒暑金坡巨然山數堵粉墨空多真
漫與大梁崔白亦善畫曾見桃花淨初吐酒酣弄筆起春
風便恐飄零作紅雨鬢流探枝婉欲語蜜蜂掇藥隨翅股
一時二子皆絕藝裘馬穿羸久羈旅華堂豈惜萬黃金苦
道今人不如古

招約之職方并示正甫書記

往時江總宅近在青溪曲井滅非故桐臺傾尚餘竹池塘
三四月菱蔓芙蓉馥蒲柳亦競時冥冥一川綠方坻最所
愛意謂可穿築欲往無舟梁長年寄心目故人晚得此心
事付草木消搖欄宇新攬結蹊隧熟更能適我願中水開
茅屋鬼管誅荒梗人境掃喧黷濠魚淨留連海鳥暖追逐
豈無方外客於此停高躅憶初桑落時要我豈非夙蠶眠

忽欲老一个未言速當緣東門水尚澀南浦舫吾廬雖隱
翳賞眺還自足橫陂受後澗直塹輸前瀆跳鱗出重錦舞
羽墮輒玉碧筩遞舒卷紫角聯出縮千枝孫嶧陽萬本母
淇澳滿門陶令株彌岸韓侯藪尚復有野物與公新聽矚
金鈿擁蕪菁翠被敷苜蓿蝦蟆能作技科斗似可讀樵軒
俯北渚花氣時度谷耘耨聊效輦締構行可續荒乘倘不
倦一晝敢辭卜雖無北海酒乃有平津肉脩脩仙李枝城
市久煩促寄聲與俱來蔭我臺上穀

寄吳氏女子

伯姬不見我乃今始七齡家書無虛月豈異常歸寧汝夫
綴卿官汝兒亦摺縉兒已受師學出藍而更青女復知女
功婉孌有典刑自吾捨汝東中父繼在廷小父數往來吉

音汝每聆旣嫁遂願懷孰如汝所丁而吾與汝母湯熨幸
小停丘園祿一品吏卒給使令膏粱以晚食安步而車駟
山泉阜壤間適志多所經汝何思而憂書每說涕零吾廬
所封殖歲久愈華菁豈特茂松竹梧楸亦冥冥芰荷美花
實瀾漫爭溝涇諸孫官來游誰謂川無舫姑示汝我詩知
嘉此林垆未有擬寒山覺汝耳目熒因之授汝季季也亦
淑靈

要望之過我廬

念子且行矣要子過我廬汲我山下泉煮我園中蔬知子
有仁心不忍釣我魚我池在人境不與獮獺居亦復無蟲
蛆出沒爭腐餘食罷往遊觀鱗鱗藻與蒲清波映白日擺
尾揚其鬚豈魚有此樂而我與子無擊壤謔聖時自得以

爲娛

遊土山示蔡天啓秘校

定林瞰土山近乃在眉睫誰謂秦淮廣正可藏一牒朝予
欲獨往扶僊強登涉蔡侯聞之喜喜色見兩頰呼鞍追我
馬亦以兩黥挾斂書付衣囊裹飯隨藥笈脩脩阿蘭若土
木老山脅鼓鐘卧空曠篋篋雕捷業升堂廓無主考擊誰
敢輒坡陀謝公冢藏椁久穿劫百金買酒地野老今行盥
紉懷起東山勝踐比稠疊於時國累卵楚夏血常喋外實
備艱梗中仍費調燮公能覺如夢自喻一蝴蝶桓温適自
斃符堅方天厭且可緩九錫寧當快一捷彼哉斗筭人得
喪易矜怯妄言屐齒折吾欲刊史牒傷心新城埭歸意終
難愜漂搖五城舟尚想浮河檝千秋籠東月長照西州堞

豈無華屋處亦捉蒲葵箠碎金諒可惜零落隨秋葉好事
所傳玩空殘法書帖清談眇不嗣陳迹恍如接東陽故侯
孫少小同鼓篋一官初嶺海仰視飛鳶跼窮歸放歎段高
卧停遠蹠牽襟肘卽見著帽耳纔摩數椽危敗屋爲我炊
陳浥雖無膏污鼎尚有羹濡筴縱言及平生相視開笑靨
邯鄲枕上事且飲且田獵或昏眠委翳或妄走超躡或叫
號而寤或哭泣而魘幸哉同聖時田里老安帖易牛以寶
劔擊壤勝彈鋏追憐衰晉末此土方岌岌強偷須臾樂撫
事終愁懔予雖天戮民有械無接摺翁今貧而靜內熱非
復葉予衰極今歲儻與雞夢協委蛻亦何恨吾兒已長鬣
翁雖齒長我未見白可鑷祝翁尚難老生理歸善攝久留
畏年少譏我兩帖囁束火扶路還宵明狐兔懾蔡侯雄俊

士心僚形亦謀異時能飛鞚快若五陵俠胡爲阡陌間跼
足僅相躡諒欲交轡語怯子不能嗜

再用前韻寄蔡天啓

蔡侯東方來取友無所挾脩脩一囊衣偶以一書笈定林
朝自炊有匕或無筴時時羹藜藿鑊大苦難燮驕頑遂敢
侮有甚觀駢脅澹然山谷中變色未嘗輒始見類欺魄寒
暄粗訓接從容與之語爛漫無不涉奇經可治疾祕祝可
解魘巫醫之所知瞽史之所業載車必百兩獨以方寸攝
微言歸易悟疾若髭赴鑷天機信卓越學等何足躡縱談
及旣往每與唐許協楊雄尚漢儒韓愈真秦俠好大人謂
狂知微乃如謀惟知造文字人惑鬼愁懾秦愚旣改臯新
眊仍易疊六書遂失指隸草矜敏捷誰珍檀山刻共賞蘭

亭帖東京一祭酒收拾偶予愜少嘗妄思索老懶因退怯
侯方習篆籀寸管靜嘗摩深原道德意助我耕且獵昔功
恐唐捐異味今得饁京口媚學子追師嘗劫劫陸羸淮汴
糧水傲湖海牒遠求而近遺如日不見睫僞鳳易悅楚真
龍反驚葉聞予再三歎往往心不厭或自逸而走或吐而
不嚼或咄元郎漫或訛白翁嘒鑠金徒欲消韞玉豈愁浥
賢愚有定分咄汝無喋喋跨鞍隨我遊曳屣聯我跼照泉
挹清泚跂石緣崑業東坡數儵魚西崦追蛺蝶翳林窺搏
黍藉草聽批頰黃萼遠蓮鬚紅閱鄰杏靨荏苒光景流楊
園忽無葉扶痾歸未久吾見喜寧帖褰裳告我去祿仕當
隨牒蕭晨秣欵段歸期得追躡謂言循東路覆出西城堞
行矣忍羈旅無魚勿彈鋏天閑久索驥駿足方騰蹠長驅

勿驕矜小踈亦勿慄鵬飛九萬里勿借風一筴溟波浩難
窮勉自養鱗鬣爵祿實天械功名爲接摺寧能復與我搖
漾秦淮檝附書勿辭頻隔歲期滿篋

獨歸

鍾山獨歸雨微冥稻畦夾岡半黃青疲農心知水未足看
雲倚木車不停悲哉作勞亦已久暮歌如哭難爲聽而我
官閒幸無事北窗枕簟風冷冷於時荷花擁翠葢細浪翻
雪千娉婷誰能斂眼共此樂秋港雖淺可揚舲

車載板二首

荒哉我中園珍果所不產朝暮惟有鳥自呼車載板楚人
聞此聲莫有笑而莞而我更歌呼與之相往返視遇若搏
黍好音而覘睨壤壤生死夢久知無所揀物弊則歸土吾

歸其不晚歸歟汝隨我可相蒿里挽。

身有車載板朝暮嘗一至。世傳鵬似鴉。而此與鴉似。唯能預人死。以此有名字。疑卽賈長沙。當時所遭值。洛陽多少年。擾擾經世意。粗聞方外語。便釋形骸累。吾衰久捐書。放浪無復事。尚自不見我。安知汝爲異。憐汝好毛羽。言音亦清麗。胡爲太多知。不默而見忌。楚人旣憎汝。彈射將汝利。且長隨我遊。吾不汝羹蔽。

謝公墩

走馬白下門。投鞭謝公墩。昔人不可見。故物尚或存。問樵樵不知。問牧牧不言。摩挲蒼苔石。點檢屐齒痕。想此絳長檣。想此倚短轅。想此玩雲月。狼籍盤與罇。井逕亦已沒。漫然禾黍村。摧藏羊曇骨。放浪李白魂。亦已同山丘。緬懷蒔

蘭蓀小草戲陳迹。甘棠詠遺恩。萬事付鬼錄。耻榮何足論。
天機自開闔。人理孰畔援。公色無懼喜。儻知禍福根。涕淚
對桓伊。暮年無乃昏。

明妃曲二首

明妃初出漢宮時。淚濕春風鬢脚垂。低徊顧影無顏色。尚
得君王不自持。歸來却怪丹青手。入眼平生幾曾有。意態
由來畫不成。當時枉殺毛延壽。一去心知更不歸。可憐着
盡漢宮衣。寄聲欲問塞南事。只有年年鴻雁飛。家人萬里
傳消息。好在羶城莫相憶。君不見咫尺長門閉阿嬌。人生
失意無南北。

明妃初嫁與胡兒。羶車百兩皆胡姬。含情欲說獨無處。傳
與琵琶心自知。黃金捍撥春風手。彈看飛鴻勸胡酒。漢宮

侍女暗垂淚。沙上行人却回首。漢恩自淺胡自深。人生樂在相知心。可憐青塚已蕪沒。尚有哀絃留至今。

食黍行

周公兄弟相殺戮。李斯父子夷三族。富貴常多患禍嬰。貧賤亦復難爲情。身隨衣食南與北。至親安能常在側。謂言黍熟同一炊。歛見隴上黃離離。遊人中道忽不返。從此食黍還心悲。

送春

武陵山下朝買船。風吹宿霧山花鮮。萬家笑語橫青天。綺窗羅幕舞嬋娟。小鬟折花叩船舷。玉琰寫酒醺金錢。朱甍飛動浮雲爨。天外箎簫來宛轉。斷橋人行夕陽路。樓觀瑠璃影中見。酡顏未分驂騑催。燭入坐客猶徘徊。豈知閭闔

門邊住春盡不見芳菲開日月紛紛車走坂少年意氣何
由挽洞庭浪與天地白塵昏萬里東浮眼黑貂裘敝歸幾
時相見綠樹啼黃鸝榮華俯仰憂患隨命駕吾與高人期

酬王伯虎

吾聞人之初好惡尚無朕帝與鑿耳目賢愚遂殊品爾來
百千年轉化薄愈甚父翁相販賣浮詐誰能審睚眦猴纓
冠狼籍鼠穴寢滄海恐值到誰論魚鼈唼鴉聲雖云惡革
去在食甚嗟誰職教化獨使此風稔恬觀不知救坐費太
官廩予生少而戇好古乃天稟念此俗衰壞何嘗敢安枕
有時不能平悲吒失食飲唯子同我病亦或涕沾衽謂予
可告語密以詩來諗爛然辭滿紙秋水濯新錦窮觀何拳
拳靜念復凜凜賤貧欲救世無寧猶拾瀋說窮且版築尹

屈唯烹飪逢時豈遽廢避俗聊須噤徂年幸未暮此意可
勤恁

送潮州呂使君

韓君揭陽居戚嗟與死鄰呂使揭陽去笑談面生春當復
進趙子詩書相討論不必移鱷魚詭怪以疑民有若大顛
者高材能動人亦勿與爲禮聽之汨夔倫同朝叙朋友異
姓接婚姻恩義乃獨厚懷哉余所陳

和吳冲卿雪

陽回力猶遭陰合勢方鞏填空忽汗漫造物誰慙憑輕於
擘絮紛細若吹毛氤雲連晝已瞽風助宵仍洶憑陵雖一
時變態亦千種簾深卷或避戶隘關猶擁滔天有凍浪匝
地無荒隴飛揚類挾富委翳等辭寵穿幽偶相重值儉輒